

Comision Bishita Real

“Uni y demostra e amor di Aruba pa Cas Real Hulandes”

ORANJESTAD – Aruba ta preparando pa e prome bishita di Su Mahestad Rey Willem-Alexander y esposa Reina Máxima, cual lo tuma luga riba dianan 20 y 21 di november. Ta reina un entusiasmo grandi mirando e amor caluroso cu pueblo di Aruba tin pa Cas Real. Dos aña pasa e pareha Real tabata na Aruba caba cu Reina Beatrix y nan a keda cu un impresion masha agradabel door di e amor cu pueblo a demostra na nan y tambe di tur loke Aruba ta haciendo.

ARUBA SU HENDENAN

Den e prome bishita oficial a scoge, den consulta cu e staff di e Rey, pa eventonan cu ta un combinacion di ceremonia tradicional di aubade cu eventonan unda e Pareha Real ta cera conoci cu Aruba y su hendenan, “pero tambe unda por demostra na nan con Aruba ta enfrenta futuro y di ki forma e pais ta desea di sosten’e den su trabou”, ta wordo bisa den un mensahe di Gobernador Fredis Refunjol riba e website www.bishitareal2013.aw. Interesante di e programanan cu ta wordo presenta na e Pareha Real ta cu cada generacion, mucha, hoben, adulto y tercer edad tin su rol. “Asina nos Rey tin e oportunidad pa cera conoci cu cada gen-

eracion separa y di e forma ey informa su mes mas tanto posibel kico ta biba den cada grupo y con nan bista ta fiha riba futuro”, ta keda enfatisa den e mensahe di Gobernador Refunjol, representante di Corona na Aruba.

PUNTONAN SU MAHESTAD

Aunke tin un comision na Aruba (Comision Bishita Real) y un na Hulanda cu ta trahando hunto riba e programanan, mester bisa cu Su Mahestad tambe tin su puntonan cu el a pidi pa tene cuenta cu nan ora nan ta na Aruba. Asina nan deseo ta di ta visibel pa mas tanto hende posibel. Den e cuadro aki ta organisando dos evento grandi, unda publico por ta presente.

PROME EVENTO PUBLICO

E prome ta riba e prome dia 20 di november, ora cu nan ta wordo ricibi dilanti Bestuurskantoor. Pa esaki ta invita scolnan pa acudi cu nan alumnonan pa e evento cu ta cuminsa 10’or di mainta. Rey Willem-Alexander y Reina Máxima ta yega bou canto di un coro. Nan lo pasa dilanti di e publico, cu por mira nan di hopi cerca, pa despues bay oficina di Gobernador. Despues lo bolbe pa Parlamento sigui pa un bishita di

mei ora na edificio Cocolishi, unda e gobernantenan ta. Na final lo despedi di e publico canando bay bek pa nan auto, pasando su dilanti. Un invitacion ta bay na tur cu por, presencia e saludo di bon-bini dilanti Bestuurskantoor pa demostra e amor grandi cu Aruba tin pa Cas Real.

DI DOS EVENTO PUBLICO

E di dos evento grandi ta e concierto publico cu ta bay tuma luga na e ruinan di Bushiribana. Esaki ta priminti di bira un anochi fabuloso cu presentacion di artistanan local como tambe di Hulanda cu tin relacion cu Aruba. Riba e anochi, publico presente ta bay mira un momento di video-mapping, haciendo uzo di tecnologia moderno. E concierto ta pa henter pueblo di Aruba. Gobernador Refunjol den un mensahe di e anuncio oficial di e bishita a expresa lo siguiente “mi ta spera sinceramente cu di berdad mes hopi habitante di nos pais lo participa den un bonbini caluroso pa nos Rey nobo y cu tur lo demostr’e cu Aruba ta su pais tambe.”

UNI Y DEMOSTRA

Comision Bishita Real di Aruba ta haci un peticion na pueblo di Aruba pa uni y demostra cu nos ta contento di por ricibi nan na Aruba.



Hobennan ta ser invita pa participa den e Exposicion cu ta organisa pa e evento “Show the King”, cu por ser haya riba Facebook tambe of

riba e website: www.bishitareal2013.aw. Riba e website ta haya tur informacion con pa participa. E deadline ta 11 di november awor. □